

四庫全書

集部

欽定四庫全書

文章辨體彙選卷一百三十四

明 賀復徵 編

表十

讓右丞相表

唐 張說

臣說言伏奉今月十日制書除臣尚書右丞相恩命自天戰跼無地臣說中謝臣少長儒門懇鑿墳史才非高格官不因人徒以命偶龍興位階鴻漸五入西掖七踐

南宮中間拙延謫放直招玷缺傷天之禽聞弦虛墜賜
環之客聽歌先泣此則魂為危感氣由懼奪安可重收
廢器再辱端揆何以師長禮闈正持憲府當今典章草
故風教鼎新野無四隱朝有三傑具瞻之地願擇時髦
臣幸沐遺簪墜履之恩好生養老之德朝遊簡牘暮對
圖書受賜無涯循榮過分豈更干處士之橫議招匈奴
之遙哂艾骨自瘡負乘致寇雖則愚情懷戀覲冒求寵
亦望聖慈限恕令度餘年願停今授長守舊史罄陳肝

膽非敢飾讓謹詣朝堂奉表自乞臣說誠惶誠恐頓首
頓首死罪死罪謹言

進鬪羊表

張說

臣某言臣聞勇士冠雞武夫戴鶡推情舉類獲此鬪羊
遠生越雋蓄情剛決敵不避強戰不顧死雖為微物志
不可挫伏惟陛下選良家於六郡求猛士於四方烏無
遁材獸不藏伎如蒙効竒靈囿角力天塲却鼓怒以作
氣前躅躑以奮擊跌若奔雲之交觸碎如轉右之相叩

裂骨賭勝濺血爭雄敢毅見而衝冠鷙狼聞而擊節冀
將少助明主市駿骨揖怒蛙之意也若使羊能言必將
曰苦鬪不解立有死者所賴至仁無殘量力取勸馬臣
緣損足未堪履地謹遣男駙馬都尉均謹詣金闕門陳
進輕冒宸嚴伏深戰越

皇太子請家令寺地給貧人表

崔融

臣某言臣聞法天之道義屬於有餘象地之宜理存於
益寡頃以咸城近縣鄜市傍州頗積風霜或侵苗稼天

皇兩儀合德百姓為心發倉廩以賑貧人垂雨露以滋
微物俗荷財成之施家懷亭毒之恩臣濫奉宗祧親承
覆載歲時衣服咸憑府藏之餘朝夕膳羞必佇饗餼之
辦過此以往臣亦何求但知問豎寢門尊師胄序魏兩
文儒之盛竊所係心漢儲湯沐之資未嘗留意但關輔
之地萌庶孔殷丁壯受田罕能充足所以水旱之歲家
室未豐正末端本思有裨助臣家令寺有地九百餘頃
特請迴授關中貧下等色雖地非安邑寧期千戶之身

而價等露臺虛費十家之產伏乞皇恩遠及聖澤旁流
矜臣愚効遂臣誠請謹遣某官奉表以聞

請致仕表

高郢

臣郢言再表陳情一心仰施瞽言無感宸眷不迴今月
四日中使魏寶義至奉宣進止賜臣還詔倍加榮獎未
允愚衷驚寵循涯伏躬隕越臣某中謝臣聞勞生佚老
天理自然蠕動翹飛日入皆息時不期而必至物雖強
而無繇禮經所以制限疲繭所以獲退自非貢禹之守

經據古趙嘉之正身匪懈韓暨之志節高潔山濤之道
德模表人皆顧望禮以至公縱過常期詎為貪冒其有
當仁不讓急病忘身豈止君命猶宜身舉故魏伐秦師
唐睢請車而游漢議邊將充國對無踰於老臣所謂忠
無不納禮亦從宜如此則選舊任能足供國用優年加
惠得遂時歸古之進退鮮不繇此臣以不才叨辱高位
幸而免戾年及乞骸苟蒙得請之恩實受終身之賜若
叨榮不忤當退而留則上累皇明下重臣罪况臣自少

力薄不知等夷年老氣衰見就羸憊形因榮弊病與齒
并營衛多乖膝脛多痺既憂廢職又懼妨賢內外交攻
生涯轉迫窮暮之懇不遑起居芻蕘之辭已罄肝膽一
物有關於亭毒容光時假於照臨顧西山而駭目瞻北
闕以馳心臣郢不勝戰惕感戀之至

代公主讓起新宅表

李嶠

臣妾言伏承聖慈以妾居處褊狹欲開拓宅北更起新
第恭聞睿旨不勝慚惕陛下骨肉之愛天至而溟深敦

叙之風日隆而月厚乃復推心連萼結念同胞方欲廣
沁水之庭除增常山之版築雖殊恩曲獎惠澤實浸於
肌膚而妨公害私謗訕恐盈於道路况臣妾承靈天妹
藉寵王姬輿服亞於椒宮土田方於茅社甲第之當衢
向市並列三區別廬之帶水連山將盈萬畝深埒則可
乘騏驥高樓則唯待鳳凰常憂瞰室之易灾實懼蒲堂
之難守寧可更求輪奐別構崇深擾閭里之忙黎傾國
家之府藏且鬼神所福嘗矜於缺隅賢聖垂箴必誠於

豐屋孫叔辭良沃之土晏嬰求湫隘之居妾雖愚蒙頗
聞訓典實願歸師老氏以止足自防仰慕周公將逸豫
為戒但希安分於容膝非敢攀榮於潤身且坊為要衝
地當貴里畝賃二三十貫居人四五百家奪其近市之
門閭生其破家之怨讐雖下人之不語豈愚妾之能安
又妾之平生每存捨施屈身濟物心所願為益已害人
情豈能處今麥苗雖盛穀價未豐家少糧儲人多菜色
但可勸耕耘之業未宜興土木之功伏乞俯察愚誠傍

詢衆望體東作之尤加知西第之非急收茲霈澤惠彼
黎蒸則天下蒼生孰不欣幸無任慙歎屏營之至謹遣
某官詣朝堂奉表陳請以聞

為歐陽通讓司禮卿第二表 李嶠

臣通言臣受恩怖懼已薦款誠而還旨綢繆未垂矜亮
俯仰跼躄心魂震蕩臣通誠惶誠恐頓首頓首死罪死
罪臣學藝雙缺心迹兩蕪顧常接言友朋而信未盈缶
陳力官守而智罕挈拚徒以沐道康衢滄和休慝四方

無事逢聖后之垂衣百度已貞得庸夫之高枕幸承寬
大遂安忝竊本將榮利求達不以廉隅自修厚祿尊官
雅是所溺陳辭抗疏豈以為高誠以理苟未安義則不
可何者器有劑限物有局量當其才則事或能濟踰其
分則力所不堪是以枯木朽株不倚棟梁之任設聞曲
學不為廊廟之資臣妨賢自久竊位非今然自承乏具
僚叨榮散職雖云尸忝未甚墮廢至於典司邦禮出納
王言徒飾躬而自強終絕臚而無力汝作霖雨既非庸

妄所堪臣為股肱必致陰陽之失虧名損實匪顧身庇
蠹政傷風將辱朝鑒誠為貪冒豈敢自安伏願回日月
之明收雲霄之澤察臣繇衷之情矜臣知止之分則周
廟之器無懼於盈滿曹人之衣或免於譏刺無任慚懼
屏營之至謹詣朝堂奉表以聞

謝賜香藥面脂表

張九齡

臣某言某至宣勅旨賜臣衮衣香面脂及小通中散等
藥捧日月之光寒移雪海沐雲雨之澤春入花門雕奩

忽開珠囊暫解蘭薰異氣玉潤凝脂藥自天來不假淮
王之術香宜風度如傳荀令之衣臣才謝中人位叅上
將疆場効淺山嶽恩深唯因受遇之多轉覺輕生之速

為建安王獻食表

陳子昂

臣謬籍葭莩叨榮圭社元戎出塞違鳳宸而逾年班師
入朝拜鸞闈而有日而策勛飲至頻承湛露之恩獻壽
奉觴未申行潦之薦所以白茅微藉願享於鈞臺潢汙
非誠思奉於瑤水謹輒獻食一百舉伏知金雞瑞鼎盈

上帝之珍羞玉女行厨盡羣仙之品味以茲非薄有陋
殞繁多慚在藻之歡竊有獻芹之志所願皇慈俯納丹
慊獲申天子萬年永慶南山之壽微臣百拜長承北極
之恩

陳情表

張文成

萬死糞土臣文成言臣忝朝班幸蒙驅策不了任使阜
應至死自可鉗口吞聲伏待刑書灰身粉骨甘從斧鉞
豈可昆虫惜命雀鼠貪生區區微心有所未盡臣平生

好學頗愛文章雖不逮於詞人濫流傳於視草近來撰
集詩賦表記等若干卷編集擬進繕寫未周負譴明時
方從極典恐士衡止息華亭之唳不聞嵇康顧影廣陵
之音永絕缺簡零落抱痛幽泉昔司馬遷請就腐刑以
終史記漢武帝愍其至懇矜而許之伏願陛下遂臣萬
請之心寬臣百日之命集錄繕寫奉進闕庭微願獲申
就死無恨然後歸臯廷尉肆諸市朝腰領橫分有同仙
化肝腦塗地百代如生骸骨埋塵千載不朽

辭上滑州刺史陳情表

李邕

臣某言臣素無藝能積負訕謗衆口之多自可銷金怨
讐之心每堪殞首伏惟陛下至明大聖察之纖微淳德
上仁洗之瑕穢山川納者不擇薰蕕天地覆之是霑雨
露且久荷惠渥大庇官榮今臣蒙國用累及軀命事出
涯分之外恩加父母之深已逝之魂復歸朽質既存之
地更忝高班雖欲殺身未能報德彌慙持祿有以保名
秋鶩辭巢必徘徊於大厦老馬離秣終顧步於華軒况

臣今茲六十有七光陰荏苒行止歎危就木之時未知
幾日懸車之歲僅有三年不任違遠涕戀之至

為韋相讓幽公表

賈至

臣見素言伏奉某月日制書封臣幽國公食邑五百戶
仍持加金紫光祿大夫兼與一子五品臣次男諤又特
授五品官者臣才術寡薄操行無取幸因資序謬陟台
衡不能變理和氣裨補德化致使四凶構慝天下震驚
鸞輿南巡函谷失守語曰馬用彼相易曰負且乘致寇

至由此言之臣雖殺身不足補過且臣值祿山干紀不能制其命臣與國忠同儕不能正其惡尸忝厚祿竊位多時一在扈從之初不即死者蓋以翠華歷險牧圉無扞駑馬思効且伏轅輿候至蜀城自拘司敗豈謂渙汗大布網豁江河茅土猥加恩迴日月當今天下未定忠義驅馳封賞之行不宜踰濫借如翼從行李操執鞭轡臣子職分何名為功以此受封不可以訓貪榮冒寵非臣所圖伏願俯垂矜憫捨此階爵不使臣父子得臯於

公議見嗤於有識微臣幸甚臣不任懇迫之至

進王維集表

王縉

臣縉言中使王承華奉宣進旨應是王維文賦並仰錄
寫進上者恩命忽臨以驚以喜退因編錄又竊感傷臣
兄文詞立身行有餘力常持堅正秉操孤貞縱居要劇
不忘清淨實見時輩許以高流至於晚年彌加進道端
坐虛室念茲無生乘興為文未曾舉筆或散朋友之上
或留篋笥之中臣近搜求尚慮零落詩筆共成十卷今

且隨表進上曲承天鑒下訪遺文魂而有知荷寵光於
幽窅沒而不朽成大名於聖朝臣不勝感戴悲懇之至
為郭令公出上都赴奉天行營勅賜錦戰袍并口

脂等謝表

王諫

臣某言臣今日巳時至臨臯驛西開府魚朝恩見奉宣
進上賜臣錦戰袍等未時至管城驛縣中使至賜臣瓜
兩顆聖慈洵及寵賜頻加榮有同於衣錦恩乃及於挾
纊重裘莫比被練非堅以此臨戎期於盡敵况傳之香

澤分以甘瓜推食解衣未足為踰誓當畢命少咎殊私
身膏草野實伸至願無任受恩稠疊之至

劉相請女婿潘炎罷元帥判官陳情表

王諫

臣晏言臣實凡淺謬典樞衡元元未安庶政多闕涓塵
罕錄尸素空慙臣女婿元帥判官駕部員外郎知制誥
潘炎入待幃幄又司戎政嫌疑之地顛沛是憂頃者累
表陳聞冀炎得歸省闈不謂天聽未達尚阻愚誠內懷
水炭若墜泉谷臣某誠惶誠恐臣聞統天下者以天下

為量舉直錯枉不私其親故能啟至公之門塞羣邪之路伏
惟元聖文武皇帝陛下紹休聖緒惟新寶厯內釐百揆
外清四海鸛鷺之士充庭滿階而臣與潘炎俱忝近密
兵權國政在臣二人是使惡炎者易為辭疾臣者易為
毀倘炎獲戾臣無以見雪脫臣遇謗炎無以自明此臣
所以寤寐兢兢惶罔知攸止昔霍光為大司馬長女婿度
遼將軍范明友次女婿羽林監任勝為東西宮衛尉威
勢崇重冠於一時不能抑退卒見傾覆前史所惡書而

貶之又劉弘為鎮南將軍時朝廷以其女婚夏侯陟
為襄陽太守弘表陟親戚舊制不得相監有詔聽從竟
免禍敗先賢所尚美而書之臣雖才謝古人智不經遠
每憂覆餗大懼妨賢竊惟瓜李之嫌寧望桑霍之許今
是以瀝肝上請昧死聞天必元帥藉災諮謀則臣甘退
引如或廟堂留臣擇用伏願終許罷炎庶遂劉弘之心
無成子孟之禍

代宗讓皇太子表

常袞

臣某言臣聞君父之命誠不合辭臣子之心固無所隱
隱之則有累天鑒辭之則有負國貞在無隱而不言雖
稟命而非孝臣所以省躬審分讓德推賢瀝懇上聞冒
嚴亟請丹誠罔敢皇睭未昭戰兢失圖精爽飛越臣某
誠惶誠恐頓首頓首伏以國之上嗣古曰元良觀象於
天應前星之環極取法於地視少海之朝宗必訪蒼龜
以承主鬯臣幼非樂善長未好儒慈獎特深愚蒙不易
教之羽籥有味樂章訓以詩書終迷義府遊虧四老才

乏五官人莫係心德非守器頃者外統羣師內錄尚書
竊懼任榮以速官謗今謬塵博望猥辱壽春位登青宮
禮絕朱邨且乖人望載贖朝經循名責實未足承天之
序捨長立賢亦猶行古之道伏惟陛下博取公議允納
微誠更擇溫文俾膺繼紹遠想伯夷之讓用升季歷之
材至公大行天下幸甚無任懇迫屏營之至謹奉表陳
讓以聞臣誠惶誠恐頓首頓首

文章辨體彙選卷一百三十四

欽定四庫全書

文章辨體彙選卷一百三十五

明 賀復徵 編

表十一

禮部賀嘉禾及芝草表

唐柳宗元

臣某等言伏見今月某日內出劍南所進嘉禾圖及陝州所進芝草示百寮者珍圖煥開瑞彩交映遐邇偕至福應攸同臣某等誠慶誠賀頓首頓首伏惟皇帝陛下

緝熙至道保合太和天惟發祥地不愛寶嘉禾擢質靈
草抽英獻於王庭唐叔慙同穎之異薦諸郊廟班史謝
連業之竒既呈疑疑之祥更覩煌煌之秀豐年斯著聖
壽用彰飲和之人歡忭無極臣優游至化披翫殊姿慶
抃之誠倍百恒品

為淮南杜相公請赴行營表

劉禹錫

臣佑言臣自守淮濱已周星紀虔奉朝典粗安遐方素
効未聞新恩荐及身曳兩綬寄深一隅蚊蚋負山力誠

不足鷹鷂逐鳥志則有餘臣再授兵符夙叅軍幕被堅
執銳雖未經於戎行受制代謀亦嘗習於事業自忝藩
翰屬時清平無施汗馬之勞但詠韃臺之什今則遭遇
殊獎委之專征以臣率先是臣素志况聞徐州士衆本
無叛心倉卒之間危疑至此臣請自臨疆場親領紀綱
裂帛繫書諭其禍福椎牛饗士養以威聲冀宣皇風照
茲蠡類以忠義感脅從之伍以含弘安反側之徒草面
峻心期乎不日其揚州留務請令行軍司馬路應權知

伏乞聖慈俯賜照鑒

蘇州刺史謝上表 劉禹錫

臣某言伏奉制書授臣蘇州刺史始從郎署出領郡長
承命若驚省躬增感臣伏惟皇帝陛下受上玄之眷佑
揚列聖之耿光大康黎元慎擇牧守德音每發品物咸
蘇臣本書生素無黨援謬以薄伎三登文科德宗皇帝
擢為御史在臺三載例轉省官永貞之初權臣領務遂
奏錄用蓋聞虛名惟守職業實無朋附竟坐飛語貶在

遐藩憲宗皇帝後知事情却授刺史凡歷外任二十餘
年伏遇陛下應運重光物無廢滯收拾舊塵忝班行
既幸逢時常思展効在集賢院四換星霜供進新書二
千餘卷儒臣之分甘老於典墳優詔忽臨又委之符竹
分憂誠重戀闕茲深石室之書空留筆札金閨之籍已
去姓名本末可明申雪無路豈意聖慈弘納不隔卑微
面辭之日特許外殿天顏咫尺臣禮兢下不敢盡言空
懷誠懇謝恩而出生光於九陌之間授訓而行布政於

五湖之外臣即以今月六日到任上訖伏以水災之後
物力素空臣謹揚皇風慰彼黎庶臣聞有味之物蠹虫
必生有才之人毀言必至事理如此古今同途了然無
蔽唯在明聖伏惟陛下察臣此言則天下之人無不幸
甚江海遠地孤危小臣雖雨露之恩幽遐必被而犬馬
之戀親近為榮臣無任感恩屏營之至

進異物駒表

令狐楚

臣某言得當道征馬使穆林狀稱忻州定襄縣王進封

村界於五月十二日夜孳化馬羣內異駒一疋白駒文馬畫圖送到者臣謹差虞辛峻專往考驗并母取到太原府而毛色變換與青駒色馱頭鐵額紅鼻肉駿尾上茸毛額帶星文旋肋骨左右各十八枚四蹄青兩眼黑續得楊林狀稱當生之夜羣馬皆嘶靈質炳然休徵備矣臣某中謝臣聞馬之精也自天而降馬之功也行地無疆是以武籍其威文榮其德謹按馬經云肋數十六者行千里伏惟陛下握負圖之瑞總服阜之靈異物殊

祥蔚然叢集臣觀前件駒靈表挺特雄姿逸異頸昂昂
而鳳顧尾宛宛以蛇蟠信坤元之利貞誠太乙之玄貺
自將到府便麗於宮每飲以清池牧於芳草則彌日翹
立驅之不前及長風時來微雨新霽輒驤首奔騁追之
莫及臣某恒親省視專遣柔馴倘駮骨峰生奇毛日就
獲登華廐既備屬車遠齊飛兔之名上奉應龍之馭天
下大慶微臣至願見今養飼至秋中即專進獻伏惟陛下
兼愛好奇想其風采今謹圖畫隨表上進

受節鉞上表

田弘正

臣聞君臣父子是謂大倫爰立紀綱以正上下其或子
不為子臣不為臣覆載莫可得容幽冥所宜共殛臣家
本邊塞累代唐人從乃祖乃父以來沐文子文孫之化
臣幸因宗族早立偏裨驅馳戎馬之鄉不覩朝廷之禮
惟忠與孝天與臣心常思奮不顧生以身殉國無由上
達私自感傷豈意命偶昌時事緣難故白办之下謬見
推宗天慈遽臨免書罪累朝章薦及仍委旂旄錫封壤

於全藩列班崇於八座君父之恩已極絲毫之効未伸
但以覲冒知羞低徊自懼是知功榮所著必俟危亂之
時微倖之來却在清平之日循涯揣分以寵為憂伏自
天寶已還幽陵肇亂山東與壤悉化戎墟外無軍士內
襄梟獍官封代襲刑賞自專國家含垢匿瑕垂六十載
臣每思此事當食忘食若稍假天年得奉宸算兼弱攻
昧批亢擣虛竭鷹犬之資展獲禽之用導揚和氣洗滌
偽風然後退歸田園以避賢路臣懷此志陛下察之

賀誅吳元濟表 元稹

臣聞拯遺眚於溝瀆非聖不能埽餘沴以雪霜非天不可日者神棄申蔡蓄為汗澍五十年間三后貽顧眇爾元濟繼為凶妖謂君命可逃謂父死為利陛下凝茲睿算取彼凶殘不越殷宗之期遂勦淮夷之命威動區宇道光祖宗凡在生成孰不懼忤臣忝官藩翰率舞闕庭瞻望徘徊無任踴躍屏營之至

賀平党項表 杜牧

臣某言伏奉二月二十七日勅党項剪除北邊寧靜華夏同慶道路歡呼臣某誠慶誠忭頓首頓首伏以上天有震耀殺戮王者有攻討誅夷是以不暫費者不久寧不一勞者不永逸伏以自古處遠人於內地未有不為患者春秋時長狄攻魯北戎病齊破衛陵燕侵秦撓晉西漢趙充國納先零於內地東朝馬文泉置當煎於三輔自後熾大侵亂關中戰爭十年騷擾四海凌逼京師發掘園陵段熲不生終不能滅後至曹公因匈奴衰弱

分為五部處在汾晉散而居之元海傑然首亂華夏中原喪沒凡數百年國朝貞觀之初突厥破滅太宗惑彥博之利口忽文貞之成算處其降衆置於河南不數十年果殘燕趙興師命將輸穀饋財天下騷然始能殄滅是知古今句人處在中土未有不為亂者伏以党羌雜種本在河外生西北之勁俗稟天地之戾氣為西戎所感舉種來降國家納之置於內地爰受冠帶兼伏征徭角觫既成觚觸是務天寶至德之際北燕偏重中原一

掀大厯建中之時安史餘波巨盜再起党羌因此亦恣
猖狂兔伏鳥飛為寇盜之耳目狼心梟響作郊畿之殘
賊比以迴鶻未殄吐蕃正強且須羈縻未可重撼於是
邊疆日駭種類歲繁每至勁弓折膠重馬免乳以魁健
之質張忿鷙之兇劫饋穀以焚舟殺輶車而閉道衆虺
盤結羣犬呌牙依據深山出沒險逕近在宇下游於穀
中艱難已來不能剷削伏惟皇帝皇天縱聖赫日資明
威極風霆謀先造化潛運睿算獨決神機箕宿禡牙狼

星歛角戊日禱馬太白揚眉按鎖而邊事無遺聚米而
兵形盡見披其要地擣以奇兵獸窮搏人鹿急走險囊
封赤羽雜沓繼來雉走檄書遠近同至十萬齊呼四面
同入行軍猶枕席之上敗寇於阻險之中或以利戈舂
喉或以長矛挾脅僵尸積壘千山之草木盡腥霆電轟
喧萬里之威靈大震詩曰不弔昊天亂靡有定此言中
國不振蠻夷入伐下人號天以告亂也復曰宣王薄伐
小雅中興是知武功不成文德不治臯陶無遺之戒史

佚非類之言若不殄除何為家國自此兵為農器草作
軒車泥糝金於常山沈殘戎於青海天覆盡得禹畫無
遺統華夏為一家用蕃邦為四守萬物由道百度皆貞
遠超三代之風使無一人之獄臣僻左小郡樸樾散材
空過流年徒生聖代尚能為詩見志作歌極情上詠神
功庶垂後代不獲稱慶闕庭無任踴躍屏營之至

代史館相公讓官表

錢珣

臣某言伏奉今月某日批詔具承聖旨臣作者固辭寵

休有異常等然始以謙讓為說終以災咎自陳未能便
動天心上迴睿渥復傾肝血進拜封章直舉其言冀蒙
昭允臣某誠迫誠懼伏惟陛下寬明有制聰哲成文揚
憲祖宣祖之風冀元和大中之運故欲治而尚亂欲泰
而未安潛測聖懷常縈百慮臣為宰輔得不周知且自
去秋以來國步未復臣每思人事每揣人情內激肺腸
有如湯火陛下當食不美當寐不甘欲以攻苦食淡之
心抱公滅私之道致陛下之理釋陛下之憂然而再東

機權未能致此者蓋臣已去之事尚有因循防患之謀
率多容易若臣去已必決防患必專天下之憂庶幾稍
改而祿位輕授之弊近歲愈深上自侯王下至卒伍受
爵賞者所承不重荷恩澤者所感不深蓋緣族類之間
踰謬者衆不重則無以勸其戮力不深則何以激其盡
心因之且不凜朝廷不畏法度不稟必亂不畏必危本
末之間實出於此今臣貴為四輔重有萬機階秩就加
朝廷常典又何必齷齪謙讓而違君命也但欲審度去

就明辨否臧以臣去已決烈之心拒天下越等干求之患使爵賞不濫與恩澤不妄加則承之者必重感之者必深如此自凜朝廷自畏法度有患可弭有難可平此事非所難為祇在陛下明察倘或信其誠請遂寢新恩則君臣之志氣大同理道之根源必正若陛下不顧其說在臣亦欲何為但抱憂惶難居夾輔有渝斯語是謂明欺君道始終聖情深淺祇期遂志不敢匿情再黷冕旒若臨泉谷臣某無任迫切恐懼俟命允許之至

為濮陽公論皇太子表

李商隱

臣某言今月某日得本道進奏院狀報今月六日宰臣鄭某等率三省官屬入論皇太子事者褫魄疆場馳魂輦轂莫知本末伏用驚惶臣聞禮贊元身易標明兩是司七鬯以奉宗祧華夏式瞻邦家大本自昔質文或異步驟雖殊既立之以賢則輔之有道北宮養德東序承榮務近正人用光繼體周則周公為太傅太公為太師漢則疎氏二賢商山四老內揚孝道外進忠規猶在去

彼猜嫌辨其疑似不由微細輕致動搖乃得守三十代
之丕圖延四百年之景祚著於史冊煥若丹青伏惟皇
帝陛下道冠百王功高三代事窺化本謀洞機先皇太
子自正位春坊傳輝望苑陛下旁延俊乂以贊溫文並
學探泉源氣壓浮競嗜魚不進求玦莫從有王褒之獻
箴無卞蘭之奉賦今縱粗乖膚旨微嗛聖心當以猶屬
妙齡未加元服或攜徒御時縱逸遊藝野夏儲亦嘗觀
舞南皮魏副屢見飛觴陛下濬發慈仁殷勤指教稍踰

規戒即震威靈雖伐木析薪必循其理而逝梁發筭亦
有可虞抑臣又聞父之於子也有嚴訓而無責善君之
於臣也有掩惡而復錄功故得各務日新並從夕改同
真于道不傷其慈儻犯在斯須便遺天性過當造次遽
抵國章則以古以今孰為令子在朝在野誰曰全臣虛
牽復之微言失不貳之深旨伏以陛下侔覆育於天地
霽赫怒於雷霆復許省廟宮闈卑謝師傅蹈殊休於列
聖慰欽矚於兆人臣才則荒涼志惟朴駮因緣代業蒙

被官榮竊諸侯之土田領大將之旗鼓當車折檻合首
它人瀝膽刺心正當今日而名非朝籍務切軍機道阻
且躋佇立以泣龍樓獻直戴遠之辭翰茂聞鳳闕拜章
張儼之精誠未泯干冒宸極無任隕涕祈恩之至

為濮陽公陳許謝上表

李商隱

臣某言臣伏奉去月八日制書授臣前件官臣即以某
月日到任上訖當時集軍州官吏僧道耆老等諭揚皇
化宣布睿慈連營咸鼓於巽風闔境均霑於允澤臣某

中謝臣材謝漢飛義慚燕使獻書求試學劍邀勲大舸
千艘早竊樓船之任勝兵萬數晚兼車騎之名雖任在
啓行而時當柔遠珠崖銅柱祇務廉平麻壘艾亭莫能
恢復旋屬皇帝陛下荆枝叶慶棣萼傳輝臣得先巾墨
車入拜丹陛蘭臺假號棘署叅榮奉漢后之園陵獲申
送往掌周王之廩庾方切事居不謂遽董戎旃還持武
節賜國既高於七命承家又慶於重侯維彼璧田實聯
鼎邑古之近甸今也雄藩想像汝南星聚而先賢未遠

經過潁上水濁而強族皆除況在昔年常憐多壘載瞻
軍額深見士心貴孝忠之兩全則忠可移孝正文武之
二道則武可輔文將謀將領之能必重英豪之選豈虞
拔擢乃出孱微豈當阜俗而必致人和貞師而不為兒
戲使流庸自占驍悍知方任棠水薤之規臣當可服黃
霸未鹽之政臣亦不遺粗勤報効之資用贖貪饕之責
奉違軒鏡幾落堯莫比園葵以自傾晝唯向日羨海槎
之不繫秋則經天感激而淚血霑衣兢憂而汗雨決背

無任感恩戀闕兢惕屏營之至

為濮陽公陳情表 李商隱

臣某言臣聞事君以忠者所宜効死食天之祿者亦戒
妨賢苟非內慊私誠外憂官謗則安肯固辭武節強委
侯圭拒七命賜國之榮捨萬里封侯之策必知不可安
敢無言臣因緣代業遭逢聖時竊嘗有志四方不埒一
室奉隨武之家事無愧陳辭慕鄧傳之門風不傷清議
屬者每憂不試深恥因媒自薦之書朝投象魏殊常之

澤暮降云香其後契濶星霜羈離戎旅從軍王粲徒感
所知掌檄陳琳亦常交辟呂元膺東周保釐之日李思
古太平畔渙之時潛入其徒盈於留邨臣此時尚持白
簡猶著青袍元膺知臣傳劍論兵本於仁信佩韃插羽
亦識狐虛俾以發奸假之捕盜幸無容刃以及焚巢旋
帶銀章俄分竹使隼旒楚峽出以分憂熊軾鄖城忽然
通貴豈意復踰五嶺更授再麾中間叨相青宮忝司緹
騎纜通閨籍又處藩條越井朝臺備經艱險貪泉湏水

益勵平生是甘馬草之言常思虎皮之誚及聖造遠流
南極許拱北辰黃犢留官胡牀挂柱如生羽翼若出嬰
羅誓以歸彼冗員處之散地俄以朝那闕守昆壤須人
一去闕庭五罹寒燠處京畿五百里之內控番寇數十
州之多提鼓燒烽增埤濬洫雖國家遠追上策不事交
爭然地豕難防兇狂易縱苟罷嚴徹警則負約渝盟臣
自受命以來為日斯久未嘗一日不修戰格未嘗一日
不數軍儲使士有鬪心人無虛額使之偵候咸亦聞知

尚未能率勵驍雄揣摩鋒鏑遠收麻壘直取艾亭成大
朝經武之威畢微臣報主之分可書竹帛不辱旂常蓋
以久處炎荒備薰瘴毒內搖心力外耗筋骸雖馬拔據
鞍尚能矍鑠而班超攬鏡不覺蕭衰恐無以早就大功
久當重任自思已熟求退為宜伏惟皇帝陛下道冠百
王功高三代照臨若日覆載如天況今國不乏人時稱
多士有才略在臣之右齒髮少臣之年俾代處是邦遞
臨斯位以之責效誰曰不宜俾前達後生皆無蔽滯由

中及外得以交相成陛下適時之方減微臣固寵之責
臣不勝祈恩懇迫之至

為榮陽公賀幽州破奚寇表

李商隱

臣某言臣得本道進奏官某狀報某月日幽州節度使
張仲武奏破奚北部落及諸山奚除舊奚王匿郎所管
外殺戮首領丁壯老幼并殺獲牛羊焚燒車帳器械等
計二十萬刺史已下面皮一百具耳二百隻奚車五百
乘羊一萬口牛一十五百頭者天聲遠疊廟略遐宣白

狄獲於寧臺赤夷俘於燕路臣某中賀臣竊窺舊史述
聽前朝有天子憂邊清宵輟寐將軍出塞白首言歸至
乃或勝或奔一彼一此竟困塞郊之柝那停絕漠之烽
猶欲叙烈旂常告功祧廟用其暫勝謂曰難能况幽朔
巨都全燕重地存臻奚寇屢擾窮邊田讓之護鮮卑莫
能深入祭彤之軍遼水唯遣相攻近歲以來為患滋甚
走單于偵邏之路懷駒支漏泄之奸張仲武重感國恩
習知邊事同三師而肄楚侔五餌以間戎乘其囂惰之

情俄得剪除之便燕犀密掛冀馬潛羈超距投石者動
過千羣戟手科頭者略踰萬計坎三鼓而河流自却聲
六校而屋瓦皆飛自使鴉懼喪林兇忙迷穴無舟掬指
有地僵尸未驚然陌之烏前軍已蹙不啖淮山之鶴後
隊仍窮遂分袁尚之頭顱仍裂蚩尤之肩骨穹廬落燼
同甲揚灰山積雲屯大収其車乘角羸耳濕盡獲其牛
羊柳水載澄桑河無事爰施吉語入解皇威此皆皇帝
陛下功格上玄運膺下武授茲成算於彼當仁震肅九

圍歡呼萬國昔艱難云始邊塵首起於盧龍今開泰有
期漢將先清於涿鹿人謀允若靈貺昭然固已上慶祖
宗下光編策錄圖洪範競三古之殊猷玉檢金泥有百
神之靈祐臣雖當防遏不介邊陲空增氣於懦夫實叨
榮於下將日圍千里天蓋九重奉一月之捷書唯知抃
蹈獻萬年之壽酒尚隔班行念風水於遐藩寄夢寐於
宣室無任望闕結戀之至

執奏裴景仙獄表

李尚隱

臣某言伏見強武縣令裴景仙犯乞取贓至五千足事
發逃走奉勅令集衆殺劫伏以景仙緣乞取犯贓辜不
至死又其曾祖故司空寂往屬締構首預元勳載初年
中家陷非辜凡其兄弟皆被誅夷惟景仙獨存今見承
嗣據贓未當坐死雖犯猶入請條十代宥賢功實宜錄
一門絕祀情或可哀願寬暴市之刑俾就投荒之役則
舊勳不棄平典斯允

文章辨體彙選卷一百三十五

欽定四庫全書

集部

文章辨體彙選卷一百三十六

八

詳校官中書臣呂光復

主事銜臣徐以坤覆勘

總校官檢討臣何思鈞

校對官中書臣高中

謄錄監生臣施華

欽定四庫全書

文章辨體彙選卷一百三十六

明 賀復徵 編

表十二

黃州謝上表

宋王禹偁

乍離近侍猶忝專城循省尤違彌深感泣伏以黃州地
連雲夢城倚大江唐時版籍二萬家稅錢三萬貫今人
戶不備一萬稅錢止及六十雖久樂昇平尚未臻富庶

永言養活亦藉循良如臣庸愚曷副憂寄謹當勤求人
瘼遵奉詔條窒塞罵訟之民束縛儉猾之吏敢言課最
庶免曠遺况當求理之朝必為無言之政伏念臣叨司
帝誥又歷周星既不曾上殿求見天顏又不曾拜章論
列時事入直則閉閣待制退朝則杜門讀書雖每日起
居實經年抱疾不敢求假恐煩醫官自後忝預史臣同
修實錄晝夜不捨寢食殆忘已盡建隆四年見成一十
七卷雖然未經進御自謂小有可觀忽坐流言不容絕

筆夫讒佞之口聖賢難逃周公為鳩鴉之詩仲尼有桓
魘之歎蓋行高於人則人所忌名出於衆則衆所排自
古及今鮮不如此伏望皇帝陛下雷霆霹怒日月迴光
鑒曾參之殺人稍寬投杼察顏回之盜飯或出如簧未
令君子之道消惟賴聖人之在上况臣孤貧無援文雅
修身不肯附離權臣祇是遭逢先帝但以心無苟合性
味隨時出一言不愧於神明議一事必歸於正直愠於
羣小誠有謗詞謀及卿士豈無公論以至兩朝掌誥四

任詞臣紕垣最忝於舊人白首不離於郎署以微臣之
行已遇陛下之至公久當辨明未敢伸理今則上國千
里長淮一隅雖云守土之榮未免謫居之歎霜摧風貶
芝蘭之性終香日遠天高葵藿之心未死仰望旒宸不
勝涕洟

潭州通判謝上表

唐介

始竄嶺南人皆謂之必死及遷湖外恩實出於再生仍
復前官俾關部政仰叨成命增激微衷切念臣寒素立

身孤直無援歷官再紀才貳郎曹入朝踰年幸兼風憲
臣自以逢聖明之治當言責之司祇知忠義以事君不
顧患禍之及已凡所上奏必盡至公流輩為臣寒心姦
邪見臣切齒臣本欲為耳目於陛下勉副簡求不能効
鷹犬於他人以希進用心雖無媿迹已甚孤屬權臣之
擅朝肆已私而害政輒輸忠款冀補涓塵陛下對之間未
能悉意天威之下卒莫自明得罪一時竄身萬里流離
遠道殆及期年擯棄遐荒分甘散秩豈謂皇帝陛下存

國大體察臣愚忠欲招諫者之言免為後來之誠三推
皇澤特與一官以邕廣之寇攘擇湖湘之守俾俾從征
筦得佐郡符然臣粗識義方薄知臣節納忠獲罪顧百
謫以誠甘盡瘁報君雖九死而不悔謹當益勤官守以
助軍興夙夜以思冀免於敗事毫分有補少答於大恩

睦州謝上表

范仲淹

獻言罪大輒効命於鴻毛宥過恩寬迴迴光於白日事
君無遠為郡甚榮恭惟皇帝陛下天德清明海度淵默

撫羣龍於宅吉念六馬而懷驚臨軒以來側席不暇思
啟心沃心之道樊危言危行之臣萬寓咸歡九門無壅
臣腐儒多昧立誠本孤謂古人之道可行謂明主之恩
必報而况首膺聖選擢預諫司時招折足之憂介立犯
顏之地當念補過豈堪循默昨聞中宮搖動外議喧騰
以禁庭德教之尊非小故可廢以宗廟祭祀之主非大
過不移初傳入道之言則臣遽上封章乞寢誕告次聞
降妃之說則臣相率伏閣冀回上心議方變更言亦翻

覆臣非不知逆龍鱗者撥壑粉之患忤天威者負雷霆之誅理或當言死無所避蓋以前古廢后之朝未嘗致福漢武帝以巫蠱事起遽廢陳后宮中殺戮三百餘人後及巫蠱之災延及儲貳至宣帝時有霍光妻者殺許后而立其女霍氏之釁遽為赤族又成帝廢許后呪詛之罪乃立飛燕姊妹妬甚於前六宮嗣息盡為屠害至哀帝時理之即皆自殺西漢之祚由此傾微魏文帝寵立郭妃譖殺甄后被髮塞口而葬終有反報之殃後周

以荒亂不興高后為尼危辱之朝不復可法唐高宗以
王皇后無子而廢武昭儀有子而立既而摧毀宗廟成
竊號之妖是皆寵衰則易搖寵深則易立後來之禍一
一不善臣慮及幾微詞乃切直乞存皇后位號安於別
宮暫絕朝請選有年德夫人數員朝夕勸導左右輔翼
俟其遷悔復於宮闈杜中外覬望之心全聖明始終之
德且默首億萬戴陛下如天皇族千百倚陛下如山莫
不雖休勿休日慎一日外米納於五諫內彌縫於萬機

而況有犯無隱人臣之常面折庭諍國朝之盛有闕即
補何用不臧然後上下同心致君親如堯舜中外有道
躋民俗於義皇將安可久之基必杜未然之釁上方虛
受下敢曲從既竭一心豈逃三黜伏蒙陛下皇明委照
洪覆兼包贖以嚴誅授以優寄郡部雖小風土未殊靜
臨水木之華燕處江湖之上但以肺疾繇久藥術鮮功
喘息奔衝精意牢落惟賴高明之鑒不投遐遠之方抱
疾於茲為醫尚可苟天命之勿損實聖造之無窮樂道

忘憂雅對江山之助含忠履潔敢移金石之心

謝直集賢院表

夏竦

北門禁省給青簡以試言東觀直廬降紫泥而命職莫
逭侯人之刺彌彰遇主之榮竊以承明設待詔之官實
漢朝之芳潤麗正啓修書之院乃唐氏之英華濬圖書
之淵啟龍鳳之宇自非弓裘繼世章句名家通授義畀
如之靈篇嫺書笏珥彤之故事則何以繼成康之美頌
考宣武之懿文陪法從於甘泉奉宸游於屬玉況當聖世

允屬簡求如臣者學不傳經文非近史青青子佩雖見
刺於勞心翹翹錯薪亦濫期於刈楚筮仕勝衣之歲薦
名象日之畿方博帶以觀光遽墨衰而公牒尋遇國家
誕敷尺詔增廣六科方棲枳以徒勞遂上封而自薦始
較文於鼇苑旋試可於鼎司亟趨文石之墀遂忝延英
之問擊轅度曲敢望於九成縈帶分墉俄登於百雉陞
象河之屬吏佐分虎之方州爰受代於瓜時遂歸朝於
幄坐典陳陳之粟閱山委之丘墟從九九之車總絲棼

之案牘暨還衡睢壤舍爵太宮既諧引籍於金闈將佐
維藩於熊軾又慮沉迷簿領廢墮簡編負公朝振舉之
科辜聖王詳延之意遂殺青而奏技果出綽以推恩禁
林俾試於雕蟲書殿遽令於抱槧閱上帝之冊府目眩
星辰登道家之蓬山足踐雲氣奉長者之餘論與先生
而並行分直石渠地接嚴更之守縱觀金匱門連著作
之廷載惟螻螻之軀莫報乾坤之賜恭惟尊號皇帝陛下
下事寢廟以至孝奉靈祇而克誠流鴻藻於絕垠鑠景

炎於往號以文明而行健體柔克以居高縱觀唐漢之
大猷備舉黃虞之故事睿藻和而六同韻天章麗而五
佐飛恢崇務廣於斯門獎擢不遺於小道遂使至孤之
士獲承非次之恩東陵遽擬於西山羔裘遂登於狐掖
歌衛風而合雅鶯齊糝而雜良誠當潔節於素絲敢不
盟心於白水益三思而出話彌九復以窮經永冰淵惕
厲之心奉日月照臨之鑒庶遐素飡之謗仰酬明主之
知媿懼所深兢惶不已

謝衣襖表

宋祁

冬籥乘辰裘官著令疾馳使驛臨撫塞屯並頒齊筭之
良均挾吳絲之煖被躬且吉束帶有華伏惟尊號皇帝
陛下至德誕敷深仁普愛念官師所以卒歲恐天下有
受其寒据秦軫窮當舒慮憐况悽其戒序必惻然動心
特以濱寒沍嚴持兵戰露句傳溫詔緘諸紋袍爛然晝
鮮照若春至刳部校什長賜各有差僻壘窮障悅而忘
苦振裾交扑聯襪相趨和氣暢肢顛折膠而何畏大恩

壓已憂稱服以為難有可仰酬不知輕殞

乞罷政事表

歐陽修

臣聞士之行已所重者始終之不渝臣之事君所難者
進退而合理苟亡大過善退其身肯之為臣全此者少
臣頃侍先帝屢陳斯言今之懇誠蓋迫於此伏念臣識
不足以通今古才不足以語經綸幸逢盛際之休明早
自諸生而拔擢方其與儒學文章之選居言語侍從之
流每蒙過獎於羣公常媿虛名之浮實暨晚叨於重任

益可謂於得時何嘗敢傷一士之賢豈不樂得天下之
譽而動皆臣忌毀必臣歸人之愛憎不應遽異臣之本
末亦豈頓殊蓋以處非所宜用過其量惟是要權之地
不勝指目之多周防所以履危而簡疎自任委曲所以
從衆而拙直難移宜其舉足則蹈禍之機以身為斂怨
之府復盤桓而不去遂謗議以交興讒說震驚輿情共
憤皇明洞照聖斷不疑孤臣獲雪其至寃四海共忻於
新政至於賴天地保全之力脫風波險陷之危使臣散

髮林丘幅巾衡卷以此沒地猶為幸民况乎擁蓋垂簷
其榮可喜撫民救瘼所寄非輕苟可效於勤勞亦寧分
於內外伏惟皇帝陛下曲回天造俯察愚衷許臣解劇
繁處之閑僻物還其分庶獲遂於安全心匪亡知豈敢
忘於報効

亳州謝上表

歐陽修

貳政非才雖獲奉身而退分符善地猶懷竊祿之慚祇
荷寵靈惟知戰懼伏念臣章句腐儒之學也豈足經邦

斗筭小器之量也寧堪大用而叨塵二府首尾八年荷
三朝之誤知罄一心而盡瘁若乃樞機宜慎而見事輒
言陷穽當前而橫身不避竊尋前載未有能全怨出仇
家構為死禍造謗於下者初若含沙之射影但期陰以
中人宣言於廷者遂肆鳴鴉之惡音孰不聞而掩耳賴
聖人之在上廓日月之至明悉究罔誣遂投讒賊再念
臣性實甚愚而疎於接物事多輕信而待以至誠如彼
匪人夫於泛愛平居握手惟期道義之交延譽當朝常

丐齒牙之論而未乾薦禰之墨已彎射羿之弓知士其
難世必以臣為戒常情共惡人將不食其餘而臣與遊
既昧於擇賢在滿不思於將覆自貽禍釁幾至顛躋上
煩睿聖之保全得完名節於終始洎懇辭於重任尤深
惻於皇慈雖避寵辭隆僅能去位而清資顯秩愈更叨
榮莫逃微倖之譏實負心顏之覲斯蓋伏遇皇帝陛下
乾坤大度堯舜至仁察臣自取於怨仇本由孤直憫臣
力難於勉強蓋迫衰殘既獲免於非辜仍曲從於私欲

遂同萬物俾無失所之嗟未盡餘生敢忘必報之效

亳州乞致仕第二表

歐陽修

臣近貢封章乞還官政伏奉詔答未賜允俞退自省循
奚勝殞越臣聞神功不宰而萬物得以曲成者惟各從
其欲天鑒孔昭而一言可以感動者在能致其誠敢傾
虔至之心再黷高明之聽伏念臣本以一介之賤叨塵
二府之聯知直道以事君每師心而自信然而既乏捐
軀之効又亡先覺之明用之已過其分而曾不自量毀

者不堪其辱而莫知引去幸賴乾坤之再造得逃陷穽之危機仍許避於要權俾退安於晚節今乃苦於衰病莫自支持顧難冒於寵榮始欲收於骸骨敢期聖念過軫天慈謂雖迫於桑榆未忍棄於草莽竊以古今之制沿襲不同蓋由兩漢而來雖處三公之貴每上還於印綬多自駕於車轅朝去朝廷暮歸田里一辭高爵遂列編氓豈知至治之朝深篤愛賢之意每示隆恩之典以勸知止之人故雖有還政之名而仍享終身之祿固

已不類昔時之士殊亡居位之榮然則在臣素心雖竊
退休之志迹臣所乞尚虞僥倖之譏伏望皇帝陛下惻
以深仁矜其至懇俾解方州之任遂歸環堵之居固將
優游垂盡之年涵泳太平之樂惟辛勤白首迄亡一善
之稱孤負明時莫報三朝之德此為慚恨何可勝陳

蔡州乞致仕第三表

歐陽修

恩深煦嫗感極涕洟雖情有迫於危心不知自止而辭
已窮於累牘幾至亡言惟以至誠期於必達自乞憐於

君父不復訊於著龜伏念臣家世單平性姿中下少從
宦學本免饑寒不自意於遭逢遂進階於華顯然而羣
材方茂蒲柳未秋而早衰衆駭並馳駑駘中道而先乏
而况荷難勝之任用竊逾分之寵榮風波憂畏而慮以
深疾病侵凌而老亦至故自辭於機政即願謝於軒裳
蒙上聖之至仁念三朝之舊物每曲煩於訓諭久未忍
於棄捐竊惟臣知事君必本忠信言不顧行是為罔欺
而臣口日誦於田間身坐貪於祿利可畏至公之議何

施有覲之顏每自省循莫遑啓處是敢罔避再三之煩
瀆猶希萬一之矜從伏望皇帝陛下特軫天慈俯回睿
聽察前言之可復蓋屢請者有年哀下愚之不移俾卒
成於素志徇其所欲言以殘骸臣若得上印綬於有司
自駕柴車而即路晚節知亡於大過沒身永荷於鴻私

謝復龍圖閣直學士表

歐陽修

恩還舊職事雪前誣感極心驚涕隨言出臣伏見前世
材賢之士身結主知勛德之臣功施王室然尚或一遭

謗毀欲辨亡由少忤要權其禍不測顧如臣者何足道
哉臣材不迨於中人功亡益於當世用之未見有効去
之亡足可思矧罔極之讒交興而並進易危之迹何恃
而不顛而聖心不忘恩意特至辨罔欺於曖昧沮仇嫉
於衆多雖暫居譴謫之中而屢被陞遷之渥今又特蒙
甄錄牽復寵名以臣之愚豈比前人而獨異推其所幸
蓋由聖主之親逢謂宜如何可以論報再念臣秉生孤
拙本乏藝能徒因學古之勤粗識事君之節苟臨危効

命尚當不顧以奮身況為善亡傷何憚竭忠而報國誓
期盡瘁少答高明

謝宣召入翰林表

歐陽修

使車入里君命在門閭巷驚傳豈識朝廷之故事搢紳
竦歎以為儒者之至榮在臣之愚何以堪此竊以文章
之任自古非輕特遇寵榮至有私人之目詢謀獻納因
加內相之名恩既異於常倫人愈難於稱職伏念臣器
非宏遠識非該明學不通古今之宜材不適方圓之用

久叨塵於侍從曾莫著於勞能而自出守外藩近遭家
禍苟存餘喘復齒周行風波流落者十年天日再瞻於
雙闕進退之際已蕭颯於霜毛慰勞有加賜憫憐於玉
色形神若此志意可知身已分於早衰心敢萌於希進
加以羈危之迹仇嫉交攻進退動繫於羣言議論多煩
於睿聽雖覆載之造每賜保全而孤蹇偷安常思引去
伏蒙皇帝陛下俯憐舊物曲軫宸慈因內署之闕員俾
備官而承乏臣敢不勉循舊學益勵前修感遺替未棄

之仁竭駑馬已疲之力庶伸薄効少答鴻恩

南京留守謝上表

歐陽修

守宮鑰之謹嚴敢忘夙夜布政條之纖悉上副憂勤寄
任非堪兢營並集伏念臣賦材庸薄稟數竒屯毀譽交
興稱嘗過實寵榮踰分動輒招尤念報効之未伸敢不
竭忠而盡瘁因風波之可畏則思遠去以深藏迨此六
年外更三守學偷安而杜口負素志以媿心朽質易衰
已凋零於齒髮良時難得尚希慕於功名豈謂皇慈未

捐舊物擢從支郡委以名都惟此別京舊當孔道簿領少勤於職事厨傳取悅於路人苟循俗吏之所為雖能免過非有古人之大節未足報君

謝賜漢書表

歐陽修

俯躬承命拭目生輝竊以右文興化乃致治之所先著錄藏書須太平而大備惟漢室上繼三代之統而班史自成一家之書文或舛訛蓋其傳之已久詔加刊定俾後學之亡疑一新方冊之文增煥秘書之府而奏篇之

始方經衡石之程，賜本之榮，惟及鈞樞之近，敢期孤外，特與恩頒。此蓋伏遇皇帝陛下，曲軫睿慈，俯矜舊物，謂其嘗與臣隣之列，不忍遽遺，憐其自喜文字之間，俾之娛老。然臣兩目昏眊，雖嗟執卷之已艱，十襲珍藏，但誓傳家而永寶。

謝擅止散青苗錢放罪表

歐陽修

有罪必誅，是為彝典。原情以恕，特出深仁。聞命驚慚，省躬涕泗。伏念臣以一介之微，賤荷三聖之獎。知寵祿既

豐初亡報効筋骸已憊尚此遲徊曲蒙大度之并容誤委一方之寄任職當撫俗責在分憂方茲旰食之勞心豈敢因循而避事昨遇國家新建官司而主計大商財利以均通分命出使之車交馳於郡縣悉發舊藏之錙取息於農氓而臣方久苦於昏衰初莫詳其利害既已大喧於物議始知不便於人情亦嘗略陳衆弊之三冀補萬分之一屬再當於班給顧已逼於會期雖具奏陳乃先擅止據茲專輒合被譴呵豈謂伏蒙皇帝陛下深軫

睿慈俯矜朴拙免從吏議持貸刑章失何草木之微曲
被乾坤之施臣敢不益思祇畏更勵操修戒小人之遂
非希君子之改過冀圖報効少答鴻私

賀南郊禮畢肆赦表

王安石

精意上昭神靈底豫茂恩旁暢夷夏接和臣聞道以饗
帝為難禮以配天為至有秩斯祐惟四表之歡心胡臭
亶時匪九州之美味自古在昔若聖與仁厥遭昌辰乃
睹熙事恭惟皇帝陛下邁種三德敷奏九功率額奉璋

之衆髦肇稱奠璧之新禮廟邊致孝郊血告幽誠既格
於穹昊福遂均於品庶振憂矜寡原宥青莪第五玉以
褒封善人是富發三錢而慶賜賤者不虛天其居歆人以
呼舞臣夙叨寵獎親值休成雖亡預於駿奔實不勝於
竊抃

乞罷政事第二表

王安石

私懷懇至已具布聞聖訓丁寧未蒙開納敢冒崇高之
聽再輸悃悞之情臣聞任賢之方要其有用陳力之義

止於不能苟弗集於事功且重罹於疹疾豈容叨據以
累明揚伏念臣猥以孤生親逢盛世昧於量已志欲補
於休明夫在信書事浸成於迂濶每煩衆論上愆聖聰
久知素願之難諧繼以積疴而自困辭而去位庶逃竊
食之誅勉以就功重荷包荒之德雖貪順命終懼妨功
伏惟皇帝陛下閎度并容大明俯燭特垂矜允俾遂退
藏如此則孤進之身獲全生於末路具瞻之地得改命
於時材

乞退第三表

王安石

聖恩所及有隆天重地之施私義未安有深淵薄冰之懼竊惟成湯高宗之世有若伊尹傳說之臣其道則格於帝而亡疑其政則加乎民而有變后惟時又相亦有終迨乎中世之陵夷非復古人之髣髴忠或不足以取信而事事至於自明義或不足以勝奸而人人與之為敵以此乘權而久處孰能持祿以少安此臣之慮危於居寵之時而昧死有均勞之乞况於抱病浸以瘵官伏

惟陛下道與日躋德侔乾覆哀一夫之失所樂萬物之
皆昌矧夫眷遇之優既已勤劬之久宜蒙善貸使獲曲全
賜其疲賤之身假以安閒之地則敝車亡用猶可具於
勞薪棄席未忘或再施於華幄

手詔令視事謝表

王安石

謗議升聞已賴舜聰之豁達懇誠工訴更煩周誥之丁寧竊以作威者主之權待察者臣之禮蓋雖蒙非常之厚遇亦將避可畏之煩言臣志尚非高才能無異舊惟

所學之迂濶難以趨時因欲自屏於寬閑庶幾求志惟
聖人之時不可失而君子之義必有行故當陛下即政
之初輒慕昔賢際可之仕越從鄉郡歸直禁林或因勸
講而賜留或以論思而請對愚忠偶合即知素願之獲
申睿聖日躋更懼淺聞之難副重叨殊獎忝秉洪鈞所
宜引分以固辭乃敢冒恩而輕就實恃明主知臣之有
素故以孤身許國而無疑人習玩於久安吏循緣於積
弊竅言不忌諛行無慚論善俗之方始欲徐徐而變革

思愛日之義又將汲汲於施為以物役已則神志有交
戰之勞以道徇人則事功無必成之望恐上辜於眷屬
誠竊幸於退藏猶貪仰附於末光亦冀粗成於薄効比
聞獨斷謂合僉言但輸承命之忠遂觸招權之毀因請
避衆賢之路庶以厭異議之人伏蒙皇帝陛下敦大兼
容清明旁燭賜之神翰諭以至懷君臣之時常千載而
難值天地之造豈一身之可酬敢不自忘形迹之嫌庶
協神明之運

謝朱熹傳聖旨令視事表

王安石

使指造臻訓詞俯逮敢圖衰疾尚悞眷存伏念臣曲荷
搜揚久孤付屬有能必獻未嘗擇事而辭難亡力可陳
乃始籲天而求佚然方焦思有為之日以此懷恩未報
之身苟營燕安豈免慚悻伏蒙皇帝陛下人惟求舊義
不忘遐乃因乘輅將命之臣更喻推轂授方之意跼履
亡用誠弗忍於棄捐朽株匪材尚奚勝於器使永惟獎
勵徒誓糜捐

謝男雱除中允說書表

王安石

恩驟加於私室多所超踰事或累於公朝誠難冒昧仰
煩睿訓曲喻至懷永惟眷獎之殊實重兢慚之至仰念
臣首叨召節得待詞林隨被贊書使陪經幄稍更歲月
莫補涓埃竊觀上智之日躋內訟淺聞而知困况如賤
息厥有童心尚迷鑽仰之方豈稱招延之禮恕已量主
非敢以私而自媿為官擇人顧雖成命而宜改輒布可
辭之義上千難犯之威伏惟皇帝陛下屈體優容垂精

寵答謂大人照臨之道廣當養以蒙意小夫誦說之意
專遽忘其賤褻稱備厚訓飭加嚴揣實未安寄顏有惡
重念自古君臣之相與未有如臣父子之所遭蓋當用
儒之時尤難講藝之職典謨方御實叅備於討論誥誓
未終已繼叨於獎擢獲世官於閭巷嗣家學於朝廷自
非忘軀何以報國知人而官以哲慨已誤於明揚委質
而教之忠誓永肩於素守

文章辨體彙選卷一百三十六

欽定四庫全書

文章辨體彙選卷一百三十七

明 賀復徵 編

表十三

謝宣召入院表

宋蘇軾

詔語春溫再命而僂使華天降一節以趨在故事以嘗
聞豈平生之敢望省循非稱愧汗交深竊以視草之官
自唐為盛雖職親事秘號為北門學士之榮而祿薄地

寒至有京兆掾曹之請豈如聖代一振儒風非徒好爵
之縻兼享大烹之養玉堂賜篆仰淳化之彌文寶帶垂
金佩元豐之新渥既厚其禮愈難其人而臣以空疎冗
散之材衰病流離之後生還萬里坐閱三遷不緣左右
之容躡處賢豪之上此蓋伏遇皇帝陛下生資文武天
祚聖神雖亮陰不言尚隱高宗之德而訪落求助已啟
成王之心首擇輔臣次求法從知人材之難得米虛名
而用臣敢不益勵初心力圖後効才不逮古雖慚內相

之名志常在民庶免私人之誚

謝除侍讀表

蘇軾

北門視草已叨儒者之極榮西學上賢復玷侍臣之高
選省循非稱愧汗交懷竊惟講讀之臣止以言語為職
考功課吏亡殿最之可書陳善閉邪有膏澤之潛潤豈
臣愚陋亦所克堪此蓋伏遇太皇太后陛下憂思深長
德業久大受先帝投艱之託為神孫經遠之謀故選左
右前後之人罔非吉士使知興亡治亂之效莫若多聞

謂臣雖無大過人之材知臣粗有不欺君之實故使朝夕與於討論奉永日之清閒未知所報畢微生於盡瘁終致此心

謝兼侍讀表

蘇軾

伏念臣志大而才短論迂而性剛以自用不回之心處衆人必爭之地不早退縮安能保全是以前三年翰墨之林屢遭飛語再歲江湖之上粗免煩言豈此身愚智之殊蓋所居閑劇之故臣之自處何者為宜而况講讀之

司帷幄最近分章摘句則何以報非常之知因事獻言
又必貽前日之患雖仰恃天日之照實常負永淵之虞
恭惟皇帝陛下大德庇民小心順帝雖天覆地載以聖
不可知為神而日就月將以學而不厭為智曲收舊物
以廣多聞臣敢不職思其憂本無分於中外欲報之德
誓不易以死生

謝復官提舉玉局觀表

蘇軾

七年遠謫不意自全萬里生還適有天幸驟從縲紲復

齒搢紳伏念臣才不逮人性多忤物剛褊自用可謂小
忠猖狂妄行乃蹈大難皆臣自取不敢怨尤會真人之
勃興與萬物而更始而臣獨在幽遠最為冥頑迨茲起
廢之初倍費生成之力終蒙紀錄不遂棄捐此蓋伏遇
皇帝陛下正位龍飛對時虎變神武不殺孰非受命之
符清淨亡為坐獲銷兵之福聰明不作邪正自分使臣
得同草木之微共霑雷雨之澤臣敢不益堅素守深念
往愆沒齒何求不厭飯蔬之陋蓋棺未已猶懷結草之

忠

謝賜對衣金帶馬表

蘇軾

服章在筭賁及衰殘銜勒過庭喜先徒御伏以物生有
待天地亡窮草木何知冒慶雲之渥采魚鰕至陋借滄
海之榮光雖若可觀終非其有妻孥相顧驚屢致於匪
頌道路竊窺或反增於指目此蓋伏遇太皇太后陛下
聰明齊聖陳錫載周含垢匿瑕而察於求賢卑宮非食
而侈於養士士豈輕於千里念非其人言有重於兼金

當思所報

謝賜對衣金帶馬表

蘇軾

錫之上駟敢忘致遠之勞佩以良金無復忘腰之適執
鞭請事顧影知慚恭惟皇帝陛下尚儉中修堯文外煥
長轡以御率皆四牡之良所寶惟賢豈徒三品之貴出
捐車服收輯事功而臣衰不待年寵常過分枯羸之質
匪伊垂之而帶有餘歛退之心非敢後也而馬不進徒
堅晚節難報深恩

杭州謝放罪表

蘇軾

臣近以法外刺配本州百姓顏章顏益二人上章待罪奉旨
特放罪者職在承宣當遵三尺之約束事關利害輒從
一切之便宜曲荷天慈不從吏議伏念臣早緣剛拙屢
致憂虞用之朝廷則逆耳之奏形於言施之郡縣則疾
惡之心見於政雖知難每以為戒而臨事不能自回苟
非日月之明肝膽必照則臣豈惟獲罪於今日久已見
傾於衆言恭惟皇帝陛下濬哲生知清明旁達委任羣

下退託於不能愛養成材唯恐其有過知臣欲去一方之積弊須除二猾以示民特屈憲章以全器使臣敢不省循過咎祇服簡書眷此善良自不犯於漢法時有貸捨用益廣於堯仁

又謝太皇太后表

蘇軾

亂羣之誅不請而決蓋恩威之亡素致奸猾之敢行方俟譴呵豈期寬宥伏以法吏網密蓋出於近年守臣權輕無甚於今日觀祖宗信任之意以州郡責成於人不

擇師帥之良但知繩墨之馭若平居僅能守法則緩急何以使民顧臣不才難以議此恭惟太皇太后陛下寬仁從衆信順得天推一身之至公納萬方於七罪而臣始終被遇中外蒙恩謂事有專而合宜情無他而可恕故加貸捨以示寵綏朝廷之明粗以臣為可信吏民自服當不令而率從

乞常州居住表

蘇軾

臣軾言臣聞聖人之行法也如雷霆之震草木威怒雖

甚而歸於欲其生人主之罪人也如父母之譴子孫鞭撻雖嚴而不忍致之死臣漂流棄物枯槁餘生泣血書詞呼天請命願回日月之照一明葵藿之心此言朝聞夕死無憾臣軾誠惶誠恐頓首頓首臣昔者嘗對便殿親聞德音似蒙聖知不在人後而狂狷妄發上負恩私既有司皆以為可誅雖明主不得而獨赦一從吏議坐廢五年積憂薰心驚齒髮之先變抱恨刻骨傷皮肉之僅存近者蒙恩量移汝州伏讀訓詞有人材實難弗忍

終棄之語豈獨知免於縲綆亦將有望於桑榆但未死
亡終見天日豈敢復以遲暮為歎更生僥覲之心但以
廩祿久空衣食不繼累重道遠不免舟行自離黃州風
濤驚恐舉家重病一子喪亡今雖已至泗州而貨用罄
竭去汝尚遠難於陸行無屋可居無田可食二十餘口
不知所歸饑寒之憂近在朝夕與其強顏忍恥干求於
衆人不若歸命投誠控告於君父臣有薄田在常州宜
興縣粗給饘粥欲望聖慈許於常州居住又恐罪戾至

重未可聽從便安輒叙微勞庶蒙恩貸臣先任徐州日以河水浸城幾至淪陷臣日夜守捍偶獲安全曾蒙朝廷降勅獎諭又嘗選用沂州百姓程棐令購捕凶黨致獲謀反妖賊李鐸郭進等一十七人亦蒙聖恩保明放罪皆臣子之常分無涓埃之可言冒昧自陳出於窮迫庶幾因緣僥倖功過相除稍出羈囚得從所便重念臣受性剛褊賦命竒窮既獲罪於天又無助於下怨仇交集罪惡橫生羣言或起於愛憎孤忠遂陷於疑似中雖

無愧不敢自明向非人主獨賜保全則臣之微生豈有
今日伏惟皇帝陛下聖神天縱文武生知得天下之英
才已全三樂躋斯民於仁壽不棄一夫勃然中興可謂
盡善而臣抱百年之永歎悼一飽之無時貧病交攻死
生莫保雖鳧鴈飛集何足計於江湖而犬馬蓋惟猶有
求於君父敢祈仁聖少賜矜憐臣見一面前去至南京
以來聽候朝旨干冒天威臣無任

謝除中書舍人表

蘇轍

越從左史擢領西垣口出命書身叅法從自念山林之迹
本無富貴之心聞命若驚固辭不獲伏念臣生本西蜀
家世寒儒學以父兄為師貧無公卿之助私有求於祿
養輒自力於文詞慨然東遊無以上達際會仁祖訪求
直言策語猖狂恃聖人之不諱考官怪怒惡悻直之非
宜孰知悟俗之言特被愛君之詔感激恩遇遂亡死生
莫酬國士之知適有私門之禍未填溝壑重迫饑寒時
於道塗望見神考一封朝奏夕聞召對之音衆口交攻

終致南遷之患生雖不遇嘗辱顧於二宗時不見容勢
殆濱於九死厄窮自致黽勉何言敢云衰病之餘復被
罷光之幸此蓋伏遇太皇太后陛下母慈均覆坤德無
私欲以姒任之明躬行堯舜之道肆求多士以遺成王
耆老畢會於朝廷耕築不遺於林莽遂令拔擢猥及空
疎馮唐已衰猶願雲中之往貢禹雖老未忘封事之勤
譬如木之在山生則荷恩而死無所怨水之於地行則
潤下而止不敢辭臣之事君義亦如此欲報之意非言

所殫

遺表

范純仁

臣聞生也有涯難逃定數死之將至願畢餘忠輒留垂
盡之期仰瀆蓋高之聽伏念臣賦性拙直稟生藉危忠
義雖得之家傳利害率同於人欲未始苟作以干譽不
敢患失以營私蓋嘗先天下而憂期不負聖人之學此
先臣所以教子而微臣資以事君粵自治平擢為御史
繼逢神考進列諫垣在苒五十二年首尾四十六任分

符擁節持橐守邊晚叨宥密之求再席鈞衡之寄遇事
輒發曾不顧身因時有為止欲及物固知滿盈之當戒
弗思禍亂之陰乘萬里風濤僅脫江魚之葬四年瘴癘
幾從山鬼之遊忽遭睿聖之臨朝首圖纖介之舊物復
官移地遣使宣恩而臣目已不明無復仰瞻於舜日身
猶可勉或能親奉於堯年豈事理之能諧果神明之見
嗇未獲九重之入覲卒然四體之不隨空慚田畝之還
上負乾坤之造猶且強親築石貪戀歲時儻粗釋於沈

迷或少紆於報効今則膏肓已迫氣息僅存泉路非遙
聖時永隔恐叩閣之靡近雖結草以何為是以假漏偷
生剗心瀝懇庶皇慈之俯鑒亮愚意以無它臣若不言
死有餘恨伏望皇帝陛下清心寡欲約已便民達孝道
於精微擴仁心於廣遠深絕朋黨之論審察邪正之歸
搜拔幽隱以盡人才屏斥竒巧以厚風俗愛惜生靈而
無輕議邊事包容狂直而無易逐言官若宣仁之毀謗
未明致保祐之憂勤不顯本權臣務快其私忿非泰陵

實謂之當然以致未究流人之往愆悉以聖恩而特叙
尚使存歿猶汙瑕疵又復未解疆場之嚴幾空帑藏之
積有城必守得地難耕凡此數端願留聖念無令後患
常軫淵衷臣所重者陛下上聖之資臣所惜者宗社無
疆之業苟斯言之可采則雖死而猶生淚盡辭窮形留
神逝

謝加學士表

劉敞

常人之情得所求而喜智者之慮過其任而憂今邊備

雖嚴帥責差易學者雖衆儒選實難豈有貪就應聲之
求忽忘非分之任怔忡失據欣懼兼懷固欲辭榮未獲
承命伏念臣猥以薄技起於諸生內之無子產潤色之
才外之無山甫將明之用久典訓誥薦臨藩垣七年於
茲微効不立猶以陪外庭之末聞長者之風間蒙分章
平議臣之奏時引大體正宗廟之儀苟圖納忠非敢忤
物然而讒人飾詞以巧詆法吏挾怨以中傷當是之時
幾無以免聖心先覺公議猶存浸潤之說不行震驚之

衆為止風波可畏天幸實多內私自憐懼久得罪輒勾
千里之守庶警一麾之行不謂尊號皇帝陛下生成曲
全覆露無已進預金華之講重增儒林之光委以西州
適其素願望非所及幸不可涯夫匹夫一飯之恩庸士
然諾之信猶能捐生出死成功立名况臣連數十城之
封兼四千石之重於以宣明威信撫養細民盡其愚忠
庶無大悔以此圖報敢為虛言

奏乞致仕表

呂誨

臣輒罄愚誠上千宸慈伏况微臣本無宿疾偶值醫者
用術乖方殊不知脉候有虛實陰陽有順逆診察有標
本治療有先後妄投湯藥率任情意差之指下禍延四
肢寢成風痺遂難行步非祇憚跋盭之苦又將虞心腹
之變勢已及此為之奈何雖然一身之微固未足卹其
如九族之託良以為憂是思逃祿以偷生不俟引年而
還政顧惟素志幾員明時力既不足誠豈得已况恃睿
鑒夙謀孤忠進非左右之容退知榮辱之分與之全節

示以曲成臣不避再煩天聽欲乞致仕仍不願改官早
賜開可臣無任顛天懇激之至

知亳州謝上表

劉敞

齒髮衰暮藩鎮會繁據非所安榮以為懼昔者聖門高
弟方六七十則所願為漢世諸儒至二千石謂之宦達
蓋量力審已雖小邦實曰才難逢辰慕君在有道不容
僥倖此所以前哲言志區區其若彼後賢受祿振振焉
在茲况如愚臣本緣末學粵塵仕路不棄曷時暨忝分

符遂更三郡曹為近輔非復自槍之譏魯并泰山仍有
變齊之舊至於渦譙名壤淮楚近郊猶龍之所誕生真
聖是焉臨幸大朝景毫兼武湯之上儀迎年執期格帝
鴻之純貺民俗既富官守維嚴豈伊戇愚猥叨寄任邈
逾涯分高視曩先密焉自思仍有餘寵獸擊換舊倥踰
朞月之淹隼旆越疆纔倍宿舂之費此蓋伏遇皇帝陛
下聖神妙算睿智極深廓久照於容光溥太和於播物
流形品彙默化陶鈞致此小材預膺榮遇謹當布宣詔

肯盡瘁官箴為身愚謀雖莫不殆於知止報國本願尚
謝餘生於自然誓殞百身勿渝一志

建寧軍節度使謝表

呂惠卿

備嚴近之選而抵非常之愆當清明之朝而罹甚重之
譴孽乃自作咎將誰歸伏念臣起自諸生諳於大道持
竅啟之聞而欲經於事變信呻吟之得而希掛於功名
今既過逾理宜顛越矧先帝有為之始乃羣材願効之
時輒先要津以闕賢路雖預討論者三四事而叅機務

者一二年凡是蠹國害民之繇實臣情學誤朝之致豈亦下流之所處更令衆惡以皆歸偶失當時士師之刑難逃今日司直之論尚蒙善貸未寘嚴誅特從四裔之遷以正三凶之比衰疲遠謫人皆知其難堪親峻生離聞者為之太息伏惟皇帝陛下天仁自得聖孝光充撫弓劍之遺藏每加悽愴顧廟堂之舊物寧不盡傷特罪悔之至深猶典刑之為屈龍鱗鳳翼已絕望於攀援蟲臂鼠肝一真心於造化涕逐言出莫知所從

文章辨體彙選卷一百三十七

欽定四庫全書

文章辨體彙選卷一百三十八

明 賀復徵 編

表十四

謝授新安郡侯表

宋 汪藻

臣某言准告命伏蒙聖恩以宗祀赦文授臣新安郡開國侯食邑三百戶者禮洽中天慶覃六服猥奉十行之詔就加五等之封中謝伏念臣積冒私恩浸踰分願昨

投間於異縣蒙起廢於偏城久客還家方憇南飛之鵲
通侯授印忽成左顧之龜雖滌漉以惟均何遭逢之獨
異茲蓋伏遇皇帝陛下調軀萬類藩飾羣工屬宣室之受釐
罄寰區而蒙福臣適臨本郡仍昨鄉州宋人泝避以得
封望胡及此漢將銀黃而夸里榮乃過之寵既逮於子
孫忠敢移於生死

謝泉州到任表

汪藻

恭承休命就易名藩去父母之邦接浙敢同於他國問

蠻夷之俗塞帷如在於中州責重捫心思深隕涕中謝
伏念臣昨從詞館叨領守符素號迂踈無間馬及羊之
知乃蒙榮授得維桑與梓之州二年而勞力勞心一身
而畏首畏尾力祈罷免反冒遷除雖賣劍買牛老猶堪
於勃海然舉頭見日身益遠於長安茲蓋伏遇皇帝陛
下總覈百工照臨萬國眷方隅之瀕海須師帥之得人
故遣近臣往綏遐俗况今閩徼莫盛泉山既旁接書文
之同當尤懲獄市之擾臣敢不仰遵寬大俯厲衰殘講

求百粵之宜叅諸禹貢奉上三年之計對以春秋

賀赤烏白雀表

汪藻

治格時雍祥昭羽屬生皆異稟凝丹素以成形出若相
符信圖書之上瑞必有召此來非偶然中賀伏以烏本
陽精鵲知歲事方聖祚紹隆於火德適天時應在於金
穰宜爾珍禽呈茲瑞質孝能致哺煌煌儀則之新喜必
傳音鷩鷩羽毛之潔用明諸福之畢至孰謂二蟲之無
知恭惟皇帝陛下保合太和緝熙純嘏政行喙息皆安

性命之情岳貢川珍盡發乾坤之蘊是生神物來相昌
期將合米以成章乃同時而薦祉徊翔有煒協周家王
屋之符粹美而真異莊子彫陵之見既九重之有托寧
三匝以求安臣等幸列近司喜逢休應有生咸遂宜多
可俯之巢同類相求將致來儀之鳳

遺表

宗澤

心期許國每輸扶厦之忠死不忘君猶積戀軒之意魂
魄將離於形體精忱願達於冕旒中謝伏念臣猥以朴

忠受知淵聖擢自困蹶羈窮之際付以寇敵往來之衝
適遇陛下出總元戎察臣精著勞効坐籌密計俾臣得
預屬僚逮夫踐祚之初首錄孤危之迹寇攘未泯暫為
淮甸之巡宗廟斯存委守留司之鑰力小任重志大心
勞誓殄敵讐再安王室但知懷主甘委命於鴻毛無復
偷生期裹尸於馬草晝夜以繼寢食靡寧斯民獲奠枕
之安敵馬無飲河之意事為紛至龜勉惟多回視頽齡
已迫桑榆之晚景益堅素節每期松柏之後彫豈謂餘

生忽先朝露尚扶病以治事敢愛已以顧私陰陽之寇
游深藥石之功莫効少延殘喘庶畢願言昨有招安到
揚進等約其衆多無慮百萬昔嘗為寇頗聚衆以震師
今已草心欲為國而戡難足踵道路雲集都城已涓吉
而戒塗擬成功於指日干戈未舉舟壑忽移神爽飛揚
長抱九泉之恨功名卑劣尚貽千古之羞仰憑睿眷之
深必無生死之異囑臣之子記臣之言力請回鑾亟還
京闕上念社稷之重下慰黎民之心命將出師大震雷

靈之怒救焚拯溺出民水火之中夙荷君恩敢忘尸諫
顯印法座無由再望於清光枯朽微生從此永辭於宸
扆

辭免都督江淮軍馬表

張浚

江淮重寄猥出異恩犬馬餘生蓋安微分輒上臣愚之
請未蒙制可之音伏念臣少不如人老將及老一士賢
百萬之衆素乏修能百里半九十之時仍當末路倘進
退不懲於迷復則鬼神將告於福謙顯罹責誚之言重

玷并包之度况明光之詔雖陳於別塞而赤白之囊不
徹於甘泉分屯已固於長城申命何資於鈇鉞伏望陛
下擴日月之照推天地之恩俯憐視陰之幾何特加全
護不憚出綸之惟反曲賜優容

謝講和赦表

岳飛

武勝定國軍節度使開府儀同三司湖北京西宣撫使
兼營田大使臣岳飛上表言今月十二日准進奏院遞
到赦書一道臣已即恭率統制領將佐官屬等望闕宣

讀訖觀時制變仰聖哲之宏規善勝不爭實帝王之妙
算念此艱難之久姑從和好之宜睿澤誕敷輿情胥悅
臣飛誠歡誠抃頓首頓首竊以婁敬獻言於漢帝魏絳
發策於晉公皆盟墨未乾頤口血猶在俄驅南牧之馬
旋興北伐之師蓋狂敵不情狡寇無信欲守金石之約
難充谿壑之求圖暫安而解倒垂猶之可也顧長慮而
尊中國豈其然乎恭惟皇帝陛下大德有容神武不殺
體乾之健行兵之權務和衆以安民迺講信而修睦已

漸遷於境土想喜見於威儀臣幸遇明時獲觀盛事身
居將閫功無補於涓埃口誦詔書面有慚於軍旅尚作
聰明而過慮徒懷猶豫而致疑謂無事而請和者謀恐
卑辭而益幣者進臣願定謀於全勝期收地於兩河唾
手燕雲終欲復讐而報國誓心天地當令稽顙以稱藩

代宰臣賀雪表

呂祖謙

皇極之主疇既叙於時寒豐年之冬兆先占於積雪續
紛六幕賁冒九圍中賀恭惟皇帝陛下綏靜嘉師財成

元化嚴凝西北歛元氣以方升疆理南東瞻同雲之已
合瑞呈禹甸喜溢堯衢臣等幸際昌辰欣逢休應授簡
而居客右雖慚梁苑之辭為樂而與民同請上齊宮之
對

謝宣召入院表

真德秀

伏以來從南服未宣民版之勞召寘北扉猥被宸綸之
寵光生里巷榮動簪紳竊以列聖之用人惟待詞臣而
加禮蓋於言語文章之外責其論思獻納之忠或雖忤

旨而暫閒終必棄瑕而復用修除翰苑在環滁出守之
餘軾侍禁庭亦赤壁歸來之後豈非加歲月則其文老
涉憂患則其慮長乃登邃嚴以備顧問如臣者才華弗
競勳拙自將掌先皇內制者六年每慚越俎迨陛下初
元之再命竟許循牆以馳驅州縣之頻且廢棄山林之
久見聞寢少藝業益荒結茅屋於雲邊已甘終老瞻玉
堂於天上若隔前生敢云白首之重來誤辱清衷之妙
簡獲玷久虛之選幾成三入之榮茲益伏遇皇帝陛下

肆筆成文解紘更化志孚羣聽欲下山東之書念在邊陲或訪河西之事必有端良之彥以充供奉之班奚取臣愚俾承人之臣敢不益堅晚節思答隆知賜宮錦而嘉草詔之能雖非敢望錄金鏡而任進賢之要實所自期

天申節賀表

陸游

化國之日舒以長運啟千齡之盛天子有父尊之至心均萬寓之驩敢即昌期虔申壽祝中賀恭惟太上皇帝

陛下宅心清靜受命溥將協氣薰為太平華夷銜莫報
之德孫謀以燕翼子宗社侈無疆之休誕敷錫於下民
丕靈承於上帝臣方馳使傳阻綴朝班望睟表於雲霄
敢恨微蹤之遠被頌聲於金石尚希薄技之陳

大行皇帝升遐鈐司慰皇帝表

文天祥

王宜日中方慶垂衣之治父有天下遽傳憑几之言宗
社憫凶幅員哀痛恭以大行皇帝王道正直帝德簡寬
奉長樂之青溫丕昭仁孝聽邇英之勸誦適紹文明方

嗣服於萬年胡委裘於一旦烏號罔極龍御何追中慰
恭惟皇帝陛下聖德升聞孝思永慕重華協帝方遐密
於八音冢宰總官將諒陰於三祀願少紓於聖抱以弘
濟於皇圖臣逖領戎軺哀傳國疚阻伸奔問惟重摧傷
皇太后加尊號鈐司賀皇帝表

文天祥

重明以繼大人璫圖垂慶介福而于王母玉冊有光瑞
溢簾帷重闕宗祏中賀恭惟皇帝陛下敬仁成信懋數
在躬惟后綏猷蹈堯舜之孝弟因親教愛奉任如之肅

雍宜申慈極之尊式表聖倫之至臣叨兼兵轄隄企陞
簾贊長信之徽稱已光漢制頌塗山之丕訓益大禹功

皇子進封左衛上將軍嘉國公賀皇太后表

文天

祥

東朝保艾方隆堯母之仁西國分茅式篤文孫之慶兩
宮喜色萬宇歡聲中賀恭惟壽和聖福皇太后陛下德
厚慈元神怡長樂尊之至也上承視膳之勤宜爾繩分
下適舍飴之趣瑤池日永玉葉春濃臣遠被繡衣隄瞻

綵服于其王母知介壽之來崇佑我後人願丕圖之有
行

皇女進封同壽公主賀皇帝表

文天祥

乾見大人道夙隆於乾體與為長女命爰寵於與申喜
溢宮庭歡騰海宇中賀竊惟興君之際必有積善之餘
播在正風則曰王姬之美陳於小雅是為女子之祥無
非歌福祿之同於以表國家之盛恭惟皇帝陛下和順
而理溫柔以容苞體深仁既茂緜瓜之瓞岡陵厚積復

培穰李之華始封爰遊於嘉名遐祉永齊於聖壽臣迹
縻使事身隔賀班親愛如家遙贊人倫之厚肅雍迪教
通觀王道之成

乾會節贛州賀皇帝表

文天祥

一人天拱適符龍御之亨萬國雲從共慶虹流之瑞系
隆宗社福被寰瀛中賀恭惟皇帝陛下曰睿曰聰乃文
乃武金甌有永紹寧人大寶之休翠蹕早朝娛太后萬
年之壽當嵩呼之華旦總夢月之佳辰兩宮同時千載


盛事臣猥叨分竹彌切傾葵奉玉卮之恭阻綴班於北
闕通銀臺之奏但伸頌於西崑

歷日謝皇帝表

文天祥

乘龍御以紀年一元正始詔虎城而頒朔千里承休敬
授人時對揚王命中謝恭惟皇帝陛下明哲作則歷數
在躬欽若昊天熙春夏秋冬之績建用皇極協雨暘寒
燠之疇乃誕布於成書以昭垂於新治臣藩宣有恪播
告惟恭錫厥庶民順中星而平秩佑於一德歌化日之

舒長



文章辨體彙選卷一百三十八